

## Capu, Cantu, Musica

À capu quì, à capu quà  
È cantu in sì o cantu in là  
Musica vechja, musicuccia  
À cantu chjaru di vuciuccia

À capu innanzu è capu inghjà  
È cantu sì o cantu innò  
Musica strana, musicHELLA  
À cantu stancu di vuciarella

À capu pienu o capu caldu  
Cantu grillachja è cantu gallu  
Musica ceca, musicaccia  
À cantu cioncu di vuciaccia

À capu viotu, capimundu  
Cantu legeru o prufundu  
Musica valsu, musicante  
À cantu arcanu di birbante

À capu rossu, capicochja  
Cantu d'acellu o di granochja  
Musica dolce, musilonga  
Cuntinueate chì s'allonga

À capu bassu o ben' sticchitu  
Ghjè cantu scioltu è incirlitu  
Musica liscia o di ciuffera  
Ghjè cantu zeppu à capillera

À capu drittu o capu chjinu  
Ghjoca chittara o violinu  
Musica tronca sfilancicata  
Cantu u baschicciu o l'abbramata

È cansu canti in cantarone  
È po l'accantu in cantinone  
faraghju u capu cantinaru  
Ci hè caratellu musica rara

Cantu cantatu da canteghja  
Hè musicchetta chì s'arregghje  
In capu canta campanile  
Cum'è stagnoni in lu casgile

Cantu muntagna, cantalena  
Musica radica c'incatena  
Capu à rughjoni di pastori  
Pienu à pagliaghji di rimori

Musica scema o paisana  
In capu spostu à sciappittana

Cantu à sechje, cantu ne fala  
Nant'una musica farfalla

Cantu di pettu, cantu d'amore  
Capu à capelli o à sudore  
Musica lenta o'ndiavulata  
S'ella hè piuvita o grandinata

Cantu malannu, cantu veghja  
Musica stella singhjuzzeghja  
In capu in faccia à capifocu  
Cantu chì basgia tempu è locu.

Musica trista, camusgiata  
À cantu spentu voce malata  
Musica bella cantichjata  
Da capu d'annu à fin' d'annata.



## À latu d'aratu

Passa è passa torna u cuncegghju d'età,  
Rutuleghja i fianchi di a terra passata  
À passi passeggeri, viaghja à l'abrucà  
Di l'anima chì marchja à passi di pensata.

Mi sò messu un'armacciu à l'arma di u core  
Vultuleghju parolle è visi verdicenti  
Apru in iss'arba zitta d'infilarate d'ore  
Una striscia d'avale cù e mane ramenti.

Passa è passa torna, apre stradelle care,  
Una sponda di rise, una sponda di dolu,  
Ammansa stonde brutte, accansa stonde chjare  
Da centumila voci s'accanta un paisolu.

Ara l'arradichera, a zitellina sciolta  
Ara venti scimiti à spettinà i ghjochi  
Passa è passa sempre, apre sognu chì volta  
L'armacciu pass'è vene di quell'arcani lochi

Hè cuncegghju chì corre sopr'à corce cunfine  
Firmate in qualchi scornu di vita sprufundata  
Ma puru ammutulite e tintenne cinine  
Un scuzzulu sulettu li scaccia una cantata

Passa è spassiegghja l'aratone di vita,  
È l'arature rosse à rimusci di prima  
Sò ferite di l'eri in anima culpita  
Muntagne fatte à sogni cù l'amarezza in cima

Hè aratu d'ira, armacciu d'amore  
Cuncegghju chì concia e guance di latte  
Empie cuchjare conche, è cunchine d'albore  
À ricordi di mele è à bazze cutrate.